



獨漉堂集卷之三

羅浮陳恭尹字元孝

增江後集

贈別

彩鳳初育羽高梧方引枝贈君如白玉追琢在今  
時極浦對遙夜新知還遠離平生頗自惜衰茶已  
如斯  
小園尋家中洲於鴈水菴先寄以詩  
十載無雙鯉三秋在五羊客居聞傍柳詩夢每臨  
塘舉世推能手終身泣鴈行不知違侍從玄鬢幾

經霜

麥叔夏齋中作

小園淡巷裏一歲一來過花木自春色其如長歎  
何命知休百念老識保元和復有閒身累畱連苦  
不多

何文止經蔚園有作兼辱寄篇依韻奉答

先公遺構此溪濱歎息年年在比鄰帳罷管絃曾  
幾日史書名姓卽千春畫圖舊壁眞生草如鏡方  
塘漸起塵多謝瑤篇遠相問疎慵不稱負薪人

甘竹灘上畱別何皇圖卽送之羅浮

一棹橫灘拍拍輕兩崖相揖隔灘聲已傷此地蒼  
茫別却羨名山自在行碧落歛雲峯影滿秋溪彫  
葉瀑流明他時念汝仙壇上夜半歌成日已生

初春送林叔吾入都

一鞭絲雨百花生花信隨君北到京欲借寇君還  
百姓暫囊姜被別諸兄春江雪水開茶色夜店佳  
人漉酒聲好熟黃金臺下路馬蹄終要自家行

送何不偕

離杯悵惜粵天春遠色青青稻葉新江海漸無高  
臥地鶯花如笑未行人多年攻玉同山石萬里辭

根學水蘋南北路岐難定計許身須念白頭親  
握山信予新塘率爾寫懷因寄止齋寒塘兩  
兄

頻年兄弟得相依散誕江鄉共掩扉薄酒上顏開  
卷後竹竿持艇探泉歸眠貪笑語橫搯枕出忘形  
骸亂著衣今日對君唯有歎鵝鵝隻翼不成飛

歲暮有作

死前生後事無涯只繫皇天不繫才得酒直須千  
日臥攤書空過十年來身同海燕家長寄日與河  
魚夜並開淡掩柴門對童稚一冬飛盡故園梅

寄李相如

南方歸客盡能傳玉貌虬鬚各宛然馬上詩成臨  
戰處幕中籌算未形先天懸山驛三千里醉別江  
船十八年莫訝雙魚頻不到昆池流水入西偏

客亭逢屈泰士

山閣依依楊柳新別君同惜少年身追尋許事如  
前日已覺相逢是老人仗劍幾時回鳥道攀髯無  
復望龍鱗秋江酒醒還分手各掩柴門到好春

下華首臺畱別旋菴海發上人

木綿花發似春風不信登臨是歲終百粵晴江山

色外六時行徑水聲中自來下土為游子肯料東  
林別遠公他夜相思何處望白雲天半佛燈紅

木綿花歌

與江二月三月來千樹萬樹朱華開有如堯時十  
日出滄海又似魏宮萬炬環高臺覆之如鈴仰如  
爵赤瓣熊熊星有角濃鬚大面好英雄壯氣高冠  
何落落後出棠榴枉有名同時桃杏慙輕薄祝融  
炎帝司南土此花無乃羣芳主巢鳥須生丹鳳雛  
落英擬化珊瑚樹歲歲年年五嶺間北人無路望  
朱顏願為飛絮衣天下不道邊風朔雪寒

南海神祠古木綿花歌

祝融帝子天人傑凡材不敢宮前列挺生奇樹號  
木綿特立南州持絳節拔地孤根自攫拏排空直  
幹無旋折生氣長資渤澥寬老鱗不受冰霜裂青  
春二月當艷陽觀者千人皆歎絕繁英貫日下無  
陰麗色燒天炙能熱堂堂正正勢莫當密密疎疎  
隨所設落瓣全鋪細草青飛鬚欲滿游絲纈似聞  
昨日銅鼓鳴海神黼黻朝天闕玉女三千笑口開  
電光一夜枝頭掣受命扶桑捧日車旌旗片片裁  
虹蜺六龍戰勝各歸來髭髯盡化玄黃血不爾花

紅何太烈君不見四照之枝不可尋赤松渺矣火  
井深爲君歲歲呈丹心  
吾友薛夫子好飲還好仙酒鐫丹鼎雜一室幽竹  
白石羅堂前更向堂西架新閣蒼翠紛紛坐前落  
七十二峰流水東青天秀出芙蓉萼主人高坐烏  
皮几短髮蕭髻垂兩耳胷中萬卷心豁然筆下餘  
霞散爲綺才高步闊駭世俗文舉楊修盡兒子朝  
見羅浮之鶴飛晴烟夜見酒旗之星明上天舉觴  
招鶴鶴來下放身八極同周旋我聞此閣未得上

疑是華陽洞裏二層軒會須更作通明客還就元  
龍地上眠

寄題魏和公吾廬

今之人材可屈指魏季寧都隱君子放舟溟海六  
月風繭足幽州八千里巨魚吞舟人食人白浪黃  
沙入睚眦危途曾不廢嘯歌壯心已覺齊生死往  
時爲我言翠微諸峰秀出旁無依丹崖剗削下絕  
地石竇委曲中開扉虬行猿引步且伏徑盡高原  
見茆屋分星牛斗卽比鄰福地金精若奴僕良朋  
或近或遠方伯兄仲兄齊鴈行干戈之際獨無事

花下往往聞宮商盈階况復美子弟講德餘暇兼  
文章有時雄辨相奔射偏師角立還堅壁有時急  
難相周旋首尾皆至如率然嗟哉古道久已喪老  
矣餘生復誰望聞君近者結吾廬亦擬吾廬結其  
上

送屈翁山之金陵

地何必生山川天何必有日月一升一沉使我老  
南北東西令人別洪河之水孤蓬根不知似我還  
似君神州蕭條寰宇黑英雄失路歸何門文章亦  
是千秋事興則爲雲降爲雨雄劍高飛雌劍畱夜

上金陵望牛女

贈余鴻客

蜀犬不識日羣吠聲狺狺越人賤章甫不以易文  
身中原龍戰二十載萬事反覆如朝昏我行驚懼  
伏草莽舉國大笑爲愚人何來年少金陵子肯道  
相思滿人耳三年覓我二樵間一夕逢君五羊市  
傾山倒海見胷臆白日照耀肝腸裏羈貧無酒畱  
君歡對坐江樓饑不起是時積雨江上晴丹楓亂  
落寒蟬鳴長風駕浪作丘壑蜃樓海市相崢嶸趙  
佗朽骨爲黃土陸賈詩書亦何補朝臺空有漢家

名浩歎今人不如古今人古人間容髮舉足之分  
邈燕越眼前得喪等烟雲身後是非懸日月怪君  
茂齡懷抱奇嚴君風義兼能詩曾窺一二每心折  
安得天馬無龍駒荒城氣黑落日短強爲吾子停  
斯須如君意氣復何道所願故心終不渝

春夜同王說作王東邨程周量宿六瑩堂懷

主人梁藥亭

南州秋色初流火西方月向梧桐墮當時歡會草  
堂前一月詞人滿高座主人命倒玉缸春小奴跪  
進雕盤果飛觥授簡恣所爲畫地書天無不可今

夜草堂集吾輩主人安在在驢背梧桐未葉月不  
明銀燈吐燄空相對簷頭急雨如揚沙飛向君前  
作雪花雪中旅店關山路欲夢何門覓君處黃金  
臺畔士如雲幾許風期似得君明朝便奮南溟翼  
老夫不勒北山文

送譚天水入閩

藍關秋高草色黃清溪楓落兼微霜去棹蕭蕭荻  
花下念君可是徒然者周郎千騎三山東畫堂邀  
客飛銀驄折鏑故鼎尚有耳老夫豈不聞高風風  
塵意氣望相識何況與君心莫逆心莫逆吹笙竽



見故人樂何如

石湖觀梅花分得動字柬羅仲恭羅顯哉兼

懷湖主人羅澹峰

溪西千樹當時種數尺枝條柔可弄不踏湖隄向  
一年已覺繁花密無縫經過昨日此怱怱兩夕懷  
思不堪誦栽花主人隔千里花下扁舟與誰共虬  
髯逸興迴不羣公子翩翩復殊衆折簡相招到石  
牀新醅不惜開銀甕遠方英俊兼秦越滿座雄談  
雜嘲諷是時霜後積水清湖西滉漾波光動四山  
開朗有佳色孤嶼蕭疎欲含凍共誇密雪賦梁園  
復訝行雲入荆夢幽光漠漠去岸高素色鱗鱗壓  
枝重拂衣屢愛輕辦飛行杯更遣濃香送逆風十  
里氣尚滿沿流百步溪猶壅高天可厭白日墜厨  
人未報清尊空老夫短棹欲早歸上客班騅亦停  
鞚開牋意思已潦倒下筆詞章乃狂縱寄謝梅花  
勿笑人絲來韻險難爲用

送張南士歸山陰

八月從象郡來九月歸稽山下天生落落穆穆人  
姿形不類風塵者廣州城西東籬花酒杯偶共良  
朋家怱怱舍意未及道相視顛毛俱有華著書何

處期之子謝公精舍清暉裏雲中黃鵠安可畱目  
送飛鴻日千里  
八月過楊伊水西郊草堂因送之游吳越  
君家草堂在西郭不遠人間似巖壑浮丘一點下  
平蕪鬱水千峰映籬落觸熱相過五月中涼飈不  
道炎蒸惡開軒氣象已爽塏入座清言復玄著愛  
君識鑒精莫倫過日雄雌辨飛鵲愛君墨妙不可  
當下筆崢嶸走龍蠖千年論事直指掌八法從心  
絕纏縛閒來爲我言素懷便欲從茲理芒屨尚平  
多累麓已畢吳越清秋有前約錢塘怒濤若車馬

九華峰巒如劍鏑攬將明秀入毫端直取幽奇恣  
揮霍快哉壯志我所同恨不俱飛比黃鶴胷中約  
結開何時夢裏江山已成昨倚欄惆悵見千里落  
日迴風散城鐸虞翻故苑空青蠅趙尉餘基尚丹  
雘遠天暮色方掩靄近寺疎鐘滿寥廓出門一揖  
因送君白頭好縱青山樂

端州閱江樓

牂牁之江千里來羚羊峽口一線開長波鼓盪氣  
不洩沙邊吼怒成風雷五月六月西潦至端州古  
城晝常閉卽今水落洲渚高急流尚作奔揚勢誰

飛傑構臨江隈下有孤石名崧臺崇基崢嶸山岳  
立古榕詰屈蛟螭迴百道文牕浮木末四樓角立  
何軒豁曲閣周流複道長高廊四注空階濶猶憶  
登樓髮尚髻樓前親見海龍朝萬乘旌旂屯北郭  
千官車馬聚寒潮三十年來重繫舸淚滴闌干獨  
愁我白雲飛盡蒼梧濛滿目寒山日西墮

贈別陳季長

白玉有美不自言陳生雖訥何溫溫天球大貝在  
高閣見之使我慙輕薄問君何來東海濱蓬萊宮  
闕浮金銀峩冠仙人挾龍杖高步綽約行青雲觴  
傾松花大笑起揮手三招魯連子丈夫濟世有苦  
心安用辛勤求不死迴車萬里趨南極神州九點  
秋烟黑離家有子正孩提髮白身長不相識夜夢  
三山芳草春掛帆辭我別愁新重來肯料相見否  
尹也東西南北人

送程周量起復入都

英英江上雲浩浩江中水水流日下雲日高與君  
離隔情如此無錢沽酒贈君別就君醉飲清歌發  
庭前乍響金風初碧樹離離照新月新月西飛向  
滄海海中老蚌含光恠珊瑚枝長犀有紋南州之

寶無君對先君門下三千人就中程子嘗冠軍卽  
今賢達每不乏野人於汝偏情親二十年間如電  
掃舊時游處今荒草屈子能爭日月光王哀分守  
松楸老人生出處各有宜看君高步何崔嵬神龍  
吐氣首萬物大鵬整翮盤天池往年被命頒新詔  
千騎東方年最少磨厓手勒泰山碑把筆醉題尼  
父廟昨者麻衣反南野江上聚觀羣擁馬盛名往  
往動時人及見恂恂一儒者滄海終爲百谷王如  
君氣度誰能量從此一坏封已畢報恩身健日偏  
長

壽姚香山熙止

英雄之才久不作汗簡丹青殊寂寞君侯飛蓋自  
北來玉面虬鬚照南國香山孤城在海島高舶如  
山浪如岳揮鞭一指招曰來羣盜如麻皆面縛虎  
飽則伏鷹飽飛千鈞弩爲鼙發機發蹤指示畧未  
畢劇賊已落千重圍孤城許許吹霜角君侯左佩  
蓮花鍔馬前親繫叛人頭秋日俘歸五羊郭能擒  
能縱古所難况君生長從儒門大兄雄武冠宇內  
介弟補袞居言官天生材氣應無匹射策長安君  
第一絲來豪俊本爲民一令天涯未言屈士元不

展稱鳳雛縫裾虞詡徒區區看君不動聲與色萬  
骨欲朽今重膚我爲此歌進玉笋匪爲君壽壽天  
下太史在朝稗在野山人不是諛人者

送沈甸華歸杭州

邊沙作霾曠衢陌行子居人總成客五羊城裏三  
見君忽忽不得論心跡君驅高轂日涉野我倚長  
竿釣山下毛錐不及帶刀人牧馬童兒笑儒者夜  
夢西湖春興生歸艤正月送君行大小嶺頭雪未  
盡南北峰高花始明花光雪色遙相接花殘雪盡  
應停楫六橋清淺見泥沙潛虬何處藏鱗鬣倒盡  
今時別酒樽余亦著書終閉門命駕相思何可易  
因風書札倘能存

晚飲湛用嗜雙峰閣卽送之北上因寄程周

量

秋月已向盡籬花黃幾枝北風昨夜吹木葉一一  
飛度樓南池登樓曠望見千里廓落天圍淨無滓  
海色爲霞樹外明雙峰如黛空中起龍鱗相比萬  
室開中有甲第排雲雷君家尚書明絕學自堰長  
江築釣臺聞孫復得任公子手探驪珠來赤水再  
獻君門雖未售南琰何患無知己塞鴻搖曳向南

聲行子迢迢更北征居人次第起相餞青衣十五  
調鳴箏飲君酒送君行中路秦淮雪正霽到日長  
安花始明長安雖樂未西笑因憶程生最同調風  
雅曾淡海上期聲華早擅中原妙別來五載音問  
稀芙蓉闕下振朝衣憑君爲寄長相念便理雲翰  
追逐飛

贈郭清霞

丈夫名不千年朽此身須後千年老秦皇漢武爾  
何人神仙不在蓬萊島郭侯少小明陰符胸中熱  
血爲洪爐鑄成寶劍無所用却羨丹砂來海隅盡  
日著書言易體竹裏柴門長不啓十年客邸絕經  
營百口何曾少薪米誰云大道貴同塵猶自徘徊  
戀舊恩彭澤但題新甲子灞陵寧識故將軍雌雄  
龍吼門前水文武火凝烟氣紫白髮無憂上鬢生  
壯心只惜同灰死雖然不死亦奚爲我心未說君  
應知待予手弄扁舟日乞爾山中五色芝

查將軍懷孔招同梁藥亭屈翁山凌天杓林

叔吾尹喬岳讌集東湖作

湖亭日午聞吹角秋隄柳色開蓮幕將軍飛蓋出  
城來白駒躑躅黃金絡臨階下馬肅衆賓先酌金

杯揖野人紫羅之中冪新果翡翠之盤行百珍湖  
中坎坎暮擊鼓玉面童兒自謔舞水影拖翻金鏤  
衣風聲促撥銀箏柱如鉤新月掛林低片片明霞  
飛向西潛魚躍浪白鷗起乾坤軒豁呈端倪帳前  
武士環趨走利劍在腰弓在手何物儒生老且狂  
葛衣高坐顏胡厚將軍好士匪自今脫畧禮數披  
胸襟終筵敬愛不知倦使我入夜無歸心我聞衛  
青有揖客信陵每下侯生色意氣相傾古不無文  
章感召何繇得將軍善將兼善詩四郊無事時復  
爲風流高會便千古安俟辛勤峴首碑

贈別董蒼水

鳳凰之美不在毛山間有鳥名寒號區區文采欲  
自見使我太息傷吾曹丈夫身當能騎臂能射姓  
名直冠麒麟畫不然採取金匱石室書褒貶千秋  
壯心魄誰能冪冪兀兀作儒生朝朝暮暮咿唔聲  
我之蹭蹬不足道看君健筆何縱橫盛時一第易  
反掌况君昆弟人皆仰何當鼓棹恣閒游七澤三  
湘迷所往峰頭榻得岫嶠碑蒼梧雲影飛參差與  
予相見五羊郭袖中千首南行詩爭奇競秀安可  
極滄江白石生漣漪曳履侯門心不屑懷刺江城

字將滅強開笑口學周旋舌本猶生面顏熱寓樓  
正月多寒風狂潮打岸聲洶洶癡吟對客自搖首  
得句出戶猶書空咄嗟乎眼前富貴既無取身後  
空名亦徒苦天涯此別一潛然異日期君定何許  
驪龍領下徑寸珠因風莫惜沉香浦

送凌天杓歸金陵

前年相識花正飛今年花下送君歸珊瑚洲北一  
揮手落花如淚霑人衣看君長身美如玉上馬顧  
盼何光輝酒間意氣橫海岳筆下錯落生珠璣舊  
京虎踞龍盤地往事蒼茫足長歎秦皇枉用厭陵  
金劉生早識興王氣前輩風流安可期羨君歸去  
臥茅茨停梭竇婦機初下奉母潘郎鬢未絲東山  
行樂無時節南海追游暫應濶寄余浩蕩千載心  
掛向秦淮滿船月

贈別王礎臣

天生豪傑將何益王郎四十爲閒客無意初從嶺  
外行因人更有黔中役高牙大旆照江滸欲駐征  
帆那可得客中沽酒贈別離可惜荔枝猶未赤王  
郎眼大少所推長身廣顙好髯髭數著欲了天下  
事千載不受英雄欺走筆文章盈百紙廿史六經



如瀉水魏武才堪捉佩刀楊修未足稱兒子去冬  
相識三城南一日不見思不堪如何棄我復遠道  
五溪蠻洞多烟嵐舊諳風土應無疵萬里爲親備  
甘旨醉別天涯日暮心丈夫未必終如此

方邵村以詩序見貽賦此謝之且以送別

大暑已過風初秋金陵歸客停扁舟滿城冠蓋爭  
飲餞一日三醉尉陀樓醉來翰墨無所惜巨筆如  
龍飛肘腋盈箱絹素積未開一篇及我山中客鴻  
文鐵畫光陸離義心苦調君所知枯樹王哀今老  
矣白頭玄晏非公誰方公公何瀟灑十年不復  
乘驄馬地生名勝恣幽人天與閒身作游者燕支  
之北昆明西羅浮日出聞天雞檳榔荔枝日大嚼  
丹砂石髓如紅泥爲君歌送君歸不能黃鵠比翼  
事四海雙犍相伴還扶犁

贈別毛行九兼寄其從父子霞

僕不與時爲俯仰雖在人間少還往逢君一揖酒  
未消當時不及論宗黨昨來再見通姓名世交於  
汝爲弟兄我父之師君從祖鳳毛麟角相崢嶸少  
年何處求高價足跡依稀徧天下笑談滿座自生  
風咳唾爲珠皆照夜黃鶴高樓十載前襄陽逋客

曾周旋君家名輩信傑出後先卓犖皆英賢聞將  
翰墨動天子三召比來皆稱旨老翁七十復何求  
出處千秋在青史如君健足乃絕塵燕臺可以空  
羣倫貧來贈別無杯酒爲報襄陽舊隱人

題鮑子韶獨醉圖

古之飲酒人陶公與阮公一觴一咏安足道高天  
萬里嗟冥鴻方其未醉時五岳橫心胸酒杯瀉作  
大海水白日倒落滄溟東鮑生能飲不數斗醺然  
顏色如花紅開口慷慨天下事走馬來自燕昭宮  
與予論交有世好披圖使我題其中吁嗟乎天地  
變化閉塞將復開如君磊落跣跣真奇才把酒獨  
醉胡爲哉急理健翮排九垓燕頷書生空願酒泉  
郡青蓮居士但築糟丘臺君不見沛公王業基四  
百壯士鴻門酒一杯

贈別查韜荒

去年梅花開君踰梅嶺來今年菊花節君歸理蘭  
糝天涯客久願君歸却惜君歸卽成別南山有鳥  
北張羅人生知己安能多况皆窮賤伏草莽吳烟  
越水勞經過比者追歡時快意左把杯盤右文字  
白日未盡紅燭催不肯相逢不沈醉南溟波浪生

長風散作高言滿篋中珠璣錯落映四座星月倒影橫霜空朝漢高臺雉堞古伏波故道牂牁通逢時自見各有以芟彘割裂皆人雄霸圖不足迴清睽麟閣千秋亦誰在已甘藿食謝當時共許著書傳後輩平生未識已相關與子年華未老間前路尚寬相見日西風莫損別離顏

送郭臯旭歸當湖

白日欲盡東方高寒雲黯黯天風號故人束裝已踰月欲發不發心勞勞北登大庾阻舟楫西瞻鬱水多旌旄同人餞送每不及各自掩戶依蓬蒿孤帆明發掛珠海賦詩我獨含霜毫往時有句用不得昨日事勢非前朝夫子文章擅時譽千金揮灑真人豪盡披肝膽與時輩每思羽翼乘烟濤曷不歸飛向林臯岸花三月湖水濶爲君把釣連巨鼈請君酌酒傾葡萄青天會得開老眼綠鬢應須減二毛

寄李相如

李公十六生虬鬚虎頭豹眼長身軀諸生籍中弄文筆姓名已自聞江湖五花大馬黃金絡終日邀人講兵畧平原不算是賢豪季生未許矜然諾上

書自獻城南田賣作軍門犒士錢寶刀屢試濡縷  
血烏府連分節鉞權獨當一隊江南北入對君王  
每前席邊頭老將避鋒芒白面儒官論資格與君  
失志復淹畱對臥飛雲百尺樓狂歌大叫取一醉  
鳳觀虎視輕王侯堂前俠客千人食盎底屢空曾  
不識千金初製鷓鴣裘脫手贈人無吝色我時弱  
冠君及壯置身自許雲臺上而今絲髮生滿頭地  
北天南一相望燕山作客近何如落拓柴門未寄  
書聞道長齋習禪寂那能不飲送居諸

程周量出守桂林寄之

鳳凰昨夜銜天語天遣郎星向荆土北闕新辭粉  
署雲南行且作芄苗雨雙旌曉出都門高入桂遙  
開秦郡古一時送者皆太息千載延之今再覩紛  
紜飲餞日不暇錯落詩篇讀劬午共驚才子守一  
麾豈識仁人利須溥天生賢俊以爲民坐保清華  
獨何取始安嶺外多阻澁戈甲雖銷猶疾苦生事  
唯應職荷鋤人家大抵稀環堵更加雜處有兵卒  
況乃流徙多浮窳兼資寬猛昔所聞丕變詩書亦  
其矩虎符龍節旣在操秋殺春生能自主惟君昨  
在司馬日眼利機明孰能伍筆前進退萬將帥階

下驅馳半熊虎稱旨嘗聞西使秦宣恩往者東臨  
魯囊中餘智辦有餘斗大數州寧足數下國聊開  
歷塊蹄天池會理搏風羽炎州故人日相憶十年  
不見心如許方候歸艤到海涯寧知取道從湘浦  
白竹湖頭秋月高爲君一把西江艣

放歌行答何皇圖

君不聞汗血駒墜地卽能走千里日食不能滿一  
石低首鹽車鳴不起又不聞丹穴雛覽德徘徊天  
路衢積粟如山不一顧食必竹實棲高梧古來志  
士不草草易得是饑難得飽陶公獨爲子春歌此

聲千載君知道池亭細語暮春天出處之義何皎  
然相門才子有公等亞夫德裕安能賢四詩贈我  
殊濤霈三舍猶應避旌旒丈夫相得在中心字句  
形骸乃其外靈洲之氣久不開驕馬蹴踏朝漢臺  
世風披靡不可道豈無豪俊多英才陳梁丘海四  
人傑後生不識爲何來愛君意氣獨健舉欲驅短  
翮乘風雷披衷置腹無矜猜嗚呼卽今誰能爲此  
語君家昔盛君尚孩安得還君舊府當三台

送離患上人住靜惠州兼懷葉許山

衆水各得月月光元在天道人無去住臨別莫悽

然暑氣當船小峰形入閣圓因依賢地主一定出  
何年

贈洪藥倩虞部

各有千秋志俱行萬里迴論交爲後輩相見慰從  
來話向杯前滿心當燭下灰十年滄海變老盡濟  
川才

臥病五羊聞故人蔡艮若之子約行授室情

不自己伏枕上得二詩

汝早孤能立艱虞亦有今雖安爲圃計未負帶經  
心讀易知餘慶稱詩在鼓琴先公期望意正不必  
華簪  
十載亾吾友中宵有淚痕何曾離夢裏容易閉泉  
門鶴髮親猶健鷓雛翼漸騫一坏仍未卜慚負不  
堪言

漫興 三首

借屋增江口悠悠十八年力窮羣籍內身老衆人  
前曲巷來風滿閒門得月偏有生同是寓終戀墓  
邊田

簡討吟詩地江門匝海濤淵源洙泗遠磊落楚雲  
高近世無真氣斯人也自豪文章本情性笑汝小

兒曹

少師生民傑善諫何雍雍馬地飛雄筆龍墀泣劍  
鋒獨當天  
下難乞老海頭峰百八年來事良時不  
可逢

出門

未有出門意篙師候水涯故人書適至江上夕初  
佳白鷺飛閒世青天入曠懷還如張翰去不復俟  
同儕

所見

禁裏會通籍人前不下牀未離阿保手已縮大夫  
章一飯中人產千金匹馬裝白頭蓬室者只自愛  
糟糠

繡袷紫頭巾驍騰馬上身臂鷹飛啄鳥手彈遠追  
人共竊軍符夜相邀野草春不知營一醉鄉曲幾  
家貧

側首

側首西南望平生李左車依人丹鳳闕近日碧雞  
書世事那能極為心尚有初虎頭今白盡飛躍更  
何如

西行

掛席春風緩融融對物華遠天排鴈字新水育魚  
花岸曲盤千樹山寒閉數家依然西去路今昔不  
同嗟

寧都魏善伯寄示其兄弟文集率題二詩報  
之

一面今猶阻千秋志未孤把君兄弟作彷彿見眉  
鬚有力牽衰眼多風激懦夫宵分涼不寐燈影落  
高梧

遂以文章著殊垂作者心道猶資化育價只待璆  
琳大地孤行迥青山一臥深人來問容色髮白已  
如今

送賴子弦任切剛歸寧都

二子何開朗來知自翠微旅中蔬飯畢江上布帆  
歸路密關心短情深出語希後期能不負家在荔  
枝磯

送李蒼水入國學兼寄相如

燕齊一萬里風雪幾人來岳勢晴猶白河聲撼不  
開新吟添倚馬古意滿銜杯宮是招賢舊無妨國  
士才

古道今蕪絕吾鄉尚有人老於朋友內覺汝弟兄



真嶺樹寒猶葉邊沙暖不春天涯新得叔風義好相親

送何不偕之桂林

千里西江路多奇是桂州裂山行巨浪依石上孤舟君見他鄉葉都歸故國流應書得意句相問海東頭

秋夜王東村梁藥亭劉漢水王蒲衣梁王顧

家夔石過宿獨漉堂讀先司馬遺集有詩

賦答二首

九原不可作古道更誰陳夜燭開遺草寒齋共故

人星橫騎尾氣霜老枕戈身一讀投湘賦泉扉自

此春

千古傷心地當年灑淚餘空還新息革終負賈生

書絳闕恩雖滿蒼生望尚虛乾坤同氣在異代豈

云疎

月夜姚菊里載酒招同郭清霞陶苦子鄒中

和簡文震重集鄒儀生寒玉堂同賦用空

字

寂歷霜天外宵來有鴈鴻樹聲風自北池影月方中良會復能再清尊況不空登臺望星彩神劍為

誰雄

李方水疾新愈同唐明犀梁藥亭陶苦子吳

山帶何郢人問之天樂堂分得醒字

故人新勿藥美酒更開瓶雖復層城裏何妨一夕  
停空階行墜葉疎樹上寒星細數更籌笑人間夢  
未醒

題丹霞雪幹圖爲澹歸大師壽

絕巘全高寄孤根壓衆芳已成空谷玉如帶掖垣  
霜世想和羹實天畱暮歲香南枝長不老微笑傍  
空王

人日新晴卽事

新年連舊雨晴好獨當人兵氣昏南紀天心惜此  
晨遠峰偏聳日一鳥自鳴春徵斂村村急桃花何  
處津

春陰

春色來何處郊雲密自西釀花成大葉催雨作新  
泥野日籠無影遙峰截欲齊良苗今有喜一爲報  
烝黎

丹柯閣畱別同梁藥亭

豈得便歸去江頭春正佳偶來唯任興小別亦傷

懷履跡朝盈戶吟聲夜出齋南園今往矣風雅在  
吾儕

大海天將曙高牕燭未灰各呈詩問病自把曆占  
來岸柳隨潮映溪花到郭開兩人乘一艇半日是  
朝臺

春日過劉漢水李世臣於黃木山堂王東村

歐陽偉人林木茅偕至卽事分賦兼懷李

鐸臣西行得青字

軒蓋來溪巷芳菲滿一庭小花叢作白新柳淺爲  
青覓句兼春枕揮盃到夜星永懷西上客江月自

揚舲

答任五陵

城闕東西路相尋不憚勞肝腸違世古詩卷與人  
高玉紙裁輕扇銀鉤落細毫經年無以報空自愧  
投桃

送姜山上人游南岳

送師西去重低何曾上衡山絕頂來夏帝碑蕪蟲  
篆徧楚天峰斷鴈行迴燈前鬼芋穿沙出霽後僧  
門鑿雪開正是到時二三月上方明月下方雷

寄程周量

薇省仙郎安好無別來三見落庭梧西風不盡鴈  
初下明月相思天一隅內詔寫歸金鳳紙新詩擎  
出木難珠故人落魄南江上穩繫藤蓑作老夫

李相如自滇池錄示近詩率爾賦寄

游子辭鄉十九春詩加疇昔更清真粵臺風雅稀  
前輩蠻國山川老此人帳下飛書銀箭曉日邊騎  
馬劍花新眼中無限英雄淚盡化明珠寄所親

屈翁山薄游代州鎮將趙君妻以姊子本秦人也讀其白母書詩以紀懷

寒垣提劍欲從誰邊草年年只早衰烏鳥私情愁

日短鴈門書札歎秋遲新爲夫壻逢秦女自寫佳  
人入楚詞旦夕絲衣還侍養一雙飛作鳳來儀

臘月望夜湛用啣水邊新閣落成招同諸子月下小飲

迴塘天淨見諸峰新閣初開月在東倒影自搖牕  
戶裏滿輪飛入酒杯中孤村歲晚聞長笛一葉寒  
聲落細風漸逼春歸幸鄰近花邊不使坐成空

寄送蒲衣自丹霞之福州

發心初不與人言二十辭家事世尊禽鳥就齋分  
石鉢獼猴同路上山門題詩空谷吟聲應宴坐秋

潭瘦影翻此去八閩潮水上荔支青欖似鄉園

鶴

遠視高肩有鳳文生來不稱在人羣朱門香稻長  
如客明月滄江總爲君一種昂藏臨水岸數聲清  
迴落寒雲碧天路近飛猶懶自啄霜毛向夕曛

塵

似空如色未分明脉脉冥冥類有情鑽隙入來知  
態巧步虛遙上極身輕稍經宿雨銷沉盡又倚西  
風澹蕩行最是貴人車馬路一回過去一層生

錢

因成形自洪爐裏冷處來希熱處過貧士橐中千  
日計五侯筵上一時歌寫將妙質傳圓月別出新  
裁付小荷只用上邊三四字從來淡愧讀書多

乞藥

癡心未肯死前休豈有丹方駐黑頭吟苦望邀來  
世讀血枯皆代昔人愁流連好夜常穿曉不出青  
春直過秋乞得老來還若此日精明似電光流泉

寄懷梁无悶

別來彌日把詩篇壯氣高文兩浩然舊劍棄爲龍  
入水新方期得鶴登天窮通一夢身何預性命兼

言道始全竹几蒲團閒永夜三年不上臥牀眠  
懷羅浮

琪樹西風粵國秋十年前記住羅浮山光一半來  
蓬島海色三更上石樓雲護藥苗侵臘長寺分泉  
響入房流葛洪丹井分明在一下人間漸白頭  
同方蒙章酌秋月下懷梁藥亭

空階布席共良宵村浦千家帶晚潮秋色蒼涼風  
在樹水光搖漾月當橋蟲經晏歲吟徧苦酒得高  
談力盡消江海論心幾人在碧天相望鴈行遙

送家中洲之青原訪藥地禪師

老依江徼謝名稱門徑蒼苔日漸增遠興忽生黃  
菊節舊心期對白頭僧吟過曉岸風千樹舟並寒  
山夜一燈想到吉州攜手地石橋新瀑半爲冰

寄青原藥地禪師

駱駝峰外寶鐘撞十八灘聲湧法幢曠代才名流  
下界半天人臥在高牕新疏瀑水虹千尺迥立寒  
階鶴一雙猶有爲霖舊時望雨花空自滿西江

伍重駒移居佛山寄之

閒雲何地不堪行近卜村居遠郡城鄰曲共知元  
亮宅市人先識伯休名每爲禽戲聰明長漸見鶴

雛羽翼成到處頓教無疾苦笑他儒術濟蒼生

苦雨偶成東家牧止

溼雲寒雨苦相仍便是籃輿出未能溝水繞門前  
後路砌苔緣壁兩三層身牽旅夢癡難曉屐印春  
泥重不勝徒憶高樓垂柳下昨來名論對陳登

寄羅若菴

看鬚如畫馬征南雖是聞聲意已淡旌節一移滄  
海上風流猶繫縣人心珠官古郡通鶉尾銅柱高  
標隔象林身作長城無一事東風鈴閣想高吟

送家明敬

不成麟閣寫朱顏仙佛門中見一斑少學齋心求  
大藥老思行世禮名山玄猿共戲當清夜白鳥隨  
舟下碧灣莫到天台便長往匣中猶有大刀環

贈胡韶先

匡廬歸路不盈旬嶺外山川久寄身一歎未忘投  
筆日十年長作曳裾人篇章每奪詞流氣甲子唯  
書酒國春生歲同君餘亦似少來多難老來貧

贈沈方鄴兼送之羅浮

夫君枉駕相尋久賤子卑棲出見遲袖裏故人勞  
遠字卷中頻日捧新詩水成波瀾平難得木有文

章病可知各是天涯同世難一杯重把定何期  
掛帆東近列仙家瑤室璇房路已賒高瀑倚風時  
作雨遠峰含日半成霞山人散住龍葱竹旅食多  
烹巨勝花知有婦翁爲鮑靚不勞丹竈問丹砂

立秋日送梁素子之丹陽

一葉桐聲墜短檣絺衣江上試新涼路人共乞龍  
蛇字詩筆相攜翡翠牀第二泉香吳市近小孤峰  
霽楚天長臨邛令尹能迎客不遣尊前憶粵鄉

送曾周士還寧都兼柬翠微諸兄

一回相見一情親語默周旋併是真早得於師承

學正似難爲弟較兄貧還從合浦探珠滿別指梅  
關落木新不遠翠微山下路年年空送往來人

題方龍媒園亭

幾日空亭坐不回主人相爲掃莓苔菴分茗火連  
僧至井汲香泉帶月來高樹蟬寒秋葉減方池魚  
躍水萍開閒園物色皆堪賦羨爾江南庾信才

送楊伯建歸豐城

嶺頭亂石老松根來去年年不憚煩古道照人如  
可贈青山得汝始能言時提佛號輪珠串愛向詞  
場請墨痕江上暫歸須有約新秋吾亦倚柴門



寄葉許山

聞君高臥江城裏宅後園林載一峰中歲身曾官  
小鳳先公名在補山龍多題逸句鑿新竹自領閒  
僧坐古松白鶴觀前湖月滿扁舟何夕此相從

贈岑梵則

江鄉淡徑引茅茨十載無忘獨到時高柳秋陰籠  
日薄小堂寒磬出花遲丹砂不秘還童訣白髮尤  
工幼婦詞今夕三城笑相看先生如舊我長髭

送魏和公歸寧都

隔年相見卽依依知爾全家住翠微窮海訪人兵

後去孤身攜劍雪中歸灘平橫浦寒流淺楓照凌  
江晚葉稀貧賤別離那可道寸心遙與片帆飛

立秋日送雪樵和尚開法曹溪

濟上家風得大機白雲高坐見人稀絕無人處干  
花繞欲有行時一葉飛溪水生香迎桂棹嶺猿隨  
衆候山扉宮中賜出袈裟在禮向西來舊祖衣

贈吳韶著

恬淡無營古所難十年聞著一儒冠坐來門巷皆  
成僻靜到鬢蒼亦帶寒讀易止尋遷善理觀心還  
得養生丹西樵山色依然在黃菊籬邊倚杖看

雲養送任克家歸皖江

秋來往往動歸思陸賈裝中半是詩鴻鴈聲高相  
別處鳳凰池好待飛時乘車載笠將何日楚尾吳  
頭更對誰想得到家初雨雪嶺梅先有寄人枝

楚國千峰入小樓闌干環映大江流夢中明月經  
年客歸興吳山昨夜秋菊徑乍開人並上秫田多

熟酒新芻家園樂事遙堪羨作賦潘郎未白頭

君家

有霄漢樓在皖城中盡挹長江之勝

春日登粵王臺

花發高臺磴道遙粵王曾此拜中朝誰云七郡初

歸漢古者南交已宅堯江勢急流宗渤澥山光相  
望憶簫韶炎州文物從來事霸氣千年倍寂寥

送家鞏寧

家世儒官獨典軍紫髯三十坐高軒戰旗指處無  
堅壘仕路從來有孟門劍長澀苔收殺氣馬驕沙  
草散蹄痕舊時贈客金錢盡更向誰人受此恩

送何不偕之潮州兼懷家鞏寧

醉敲如意短歌殘鷓首東行歲漸寒霜下參差聞  
墜葉月中淡淡見澄灘龍川地古那逢令鱷渚魚  
多不避官猶有故人閒射獵秋田騎馬好追歡

春夜集丹柯閣聽蟲分賦得心字

方塘千尺在堂陰。一片春蟲語漸深。出蟄驚雷喧昨夜。洗兵疎雨過前林。希微擬共寒更轉。斷續如知座客吟。況是將軍鈴閣下。聞聲倍切式蛙心。

市橋春望

海門東盡不生瀾。景物登臺極大觀。紅蕊點村千室曙。碧天圍水數峰寒。珊瑚多入漁人網。玉食先歸野客盤。倘許閒身坐垂釣。客星不擬落嚴灘。

贈林孟易

傳家世世有忠貞。斯世真堪作老生。聖學久窺牆數仞。佛門新禮磬三聲。輕身似雀偏宜壽。全德如雞孰敢爭。五十年來無限事。白頭不負泰階平。

早鴈

一聲初度自衡湘。斷續天邊見幾行。似有驚疑同避弋。只應來去爲隨陽。高飛關塞何曾阻。久宿蒹葭漸有霜。白首蘇卿無恙在。北風時節倍思鄉。

送魏善伯之潮州

嶺頭秋盡枉高車。便向潮陽應辟書。行跡欲同沙塞鴈。文章應走惡溪魚。中宵剪燭論心地。十載傳緘識面初。幸是英豪爲共事。故人無復嘆離居。

賀胡韶先舉孫  
昔時見子初生子今日佳兒已抱兒家慶便多庭  
下絲鄉書遙慰鬢邊絲灰餘爐火重增燄霜後高  
松漸著枝三十年來天一轉深杯相對好開眉

彭飛雲刺史見訪

今世須才致治平古人機畧見先生剖符舊化三  
巴俗伏軾曾降七十城幕府每聞飛健檄席門何  
自枉高旌天南賤子能捫蝨坐聽高談爲洗兵

送張穆之移家東安

村浦停舟倚浪花叩門辭我日將斜殷勤說與相  
尋路千歲藤邊獨一家

舟夜

夜寒猶自擁秋衣水底星河數鴈飛空得家書無  
一字滿城稠疊寄當歸

題畫二首

真山須似畫安排畫出如真也自佳借我壁間懸  
數日清猿涼月滿書齋  
深山深處有人爭擬寄閒身畫裏行淨掃柴門無  
箇事碧溪寒葉一聲聲

一聲一恨在塗泥雖有清操未有知待化羽衣吟  
露日世人方信飲泉時

獨將一面候蟲過饑任微生飽在他村舍久知無  
好客勞君門外更張羅

蜂

穿花度葉日紛紛出自知時處有羣獨佩秋蘭何  
處獻慙卿一食不忘君

江上曲

雙蛾畫不成十五背孃行獨自搖蘭槳橫塘月未

生

秋夕過湛泉長同賢從迪周飲於荷舫

宅邊池館似舟居布置溪橋亦自如疎樹映門涼  
雨後曲欄涵水夜星初秋來算畝收黃菊燭下輪  
刀鱸白魚酒罷分題羣從散新篇相許寄吾廬

十月夜同湛用嗜過泉長縱飲梅花下

似雲孤起雀孤飛一片空明立小池過客只慙依  
玉樹見花何必羨瓊枝月當瘦影徘徊見酒引濃  
香寂寞知落得滿頭君莫笑鬢毛非久亦如斯

游俠詞

左刀如白虎右劍象蒼龍直走長城北風雲滿路  
中寔莫賦新詩識顛昔莫笑鏡手非人亦收襟  
相見一杯酒天涯卽弟兄出門贈百萬上馬不通  
名雲孤賦蜜瓜張一式空閑立小飲長客只憑  
十年居委巷上有白頭親此別逢知己微軀亦借  
人餘白魚西歸不厭沙翁詩語困情寄寄  
移家西歸畱別湛克正克茂外弟兼柬同人  
西還雖得邇鄉園最是難分汝弟昆春酒自澆離  
別地東風含歎鵲鴿原多年瘞玉烟猶暖當日傾  
巢卵幸存白髮漸生吾老矣幽冥將負丈人恩

獨漉堂集卷之四

羅浮陳恭尹字元孝

江村集 小序

甲寅之春亂起滇閩至丙辰而東西交偪及  
於惠肇予所居新塘東江之衝也二月挈家  
西還僦居羊額甫定而廣州變與東西連和  
丁巳夏廣州復通於北戊午春余移居龍江  
其秋而罹无妄之灾下於理者二百餘日已  
未春事始解四年之間虛名爲累日周旋刀  
鋒箭鏃中自有生以來未有危於斯者視丁

亥之禍覆巢毀卵始有甚焉庚申而後乃稍  
得晏然復理詩書有同人唱酬之樂甲子始  
卜小禺山舍丙寅冬遂定居焉龍江羊額並  
屬江村故自丙寅以溯丙辰十年之詩爲江  
村集其間一燬於兵一竊於賊平生著作大  
半佚焉

新苗

高田易爲瘠下田易爲肥高田苗欲密下田苗欲  
稀春陽三二月陰雨來霏霏無論高與下青青同  
一時疎如鴈行列密若羊毛披清風颯然至蕩漾

生漣漪迴旋合萬舞在弱不自持遙遙極天碧望  
望深人懷先王制四民士首農次之非時尚不役  
矧乃鞭與笞一夫不播種世有受其饑須知元元  
命繫此青青絲賤子爲老農敢以告有司

修禊後十日石濂禪師招同諸公雅集長壽

禪林卽事賦

真妄非二途愚智各有適同此聞見中心日異喧  
寂西郊亦人境靜者得幽僻交錯引翠條蕭疎布  
林石春事滿高窓鳥聲在檐隙悠然古招提曠若  
新開闢嘉招及令序竟日隨飛錫論詩陋休遠析

理兼玄易既喪我於吾焉知主爲客欲別聞清鐘  
溪山暮雲碧  
與君初一揖未語神先躍磁石受金針大小都不  
却船頭一尊酒頗盡新知樂秋風吹長棘半載成  
乖各匪伊動忍謀蒼天亦云虐惓惓君子心直可  
高雲薄君家在何所巴水明西郭才爲此身累不  
得耽丘壑游蹤徧西土美政流南國五馬今何之  
甘棠尚如昨無因一出送益我懷中惡男兒事蓬  
矢豈可辭  
賢地大雅應有作何時遺之音願附羅浮雀

獄中送郭清霞兼寄李相如

輕風驅行雲中天日雷電霖潦在康衢積陰曠城  
縣良朋當遠適冒雨來相見未言先慰藉恐我泣  
如霰拜送園土中握手情戀戀鳳鳥覽德輝高飛  
使人羨雉雉集山梁色舉何其善嗟哉雲中鵠今  
作泥巢燕江頭路幾許不獲銜杯餞況聞故人返  
萬里期言宴如何二紀別良晤乖一旦九州不盈  
掌日月雙丸轉流萍合有時鬢髮將無變因君謝  
故人努力千秋傳



獄中值林叔吾生日贈之

我生長於君為日百五十何期來獄門初度亦相  
及來時秋未徂不覺春風入魚沫尚相濡蟲鳴已  
離蟄衰柳落復生燕雛去還集眷言南冠士不作  
岐途泣醉則相和歌昏猶把書立吾道豈云非高  
天意難執匪兇率柙中皎駒孰維繫幸非修名累  
漸爾沈憂戢五岳路未遙故山芝可拾相期保百  
齡懷哉荷簞笠

古意

去家三十年昨夜夢歸里不見舊家門但見同鄉  
子雖非久言笑亦勝長羈旅誰云夢可續願奉千  
金市

贈任五陵

任君介然稀所可客邸杜門終日坐三年懷刺已  
生毛一旦間關勞問我卷中先示禽言歌嬉笑之  
下痛哭多花下從君讀終日正名紀號皆不磨水  
走雲流無定質不尚高華務平實五岳真形筆底  
看百家奇秘紛然失如君好事古有誰九州車轍  
安足奇穆王空有八駿馬豈謂書生能得之三閭  
大夫遠游者足跡未能遍中夏虛無閭闔叫不開

枉用離騷繼風雅能游能賦兩足矜半生躡屩還  
擔簦計功而食不妄取神寒骨峻門如冰試與極  
言當世計達變通經還審勢如此人居草澤間蒼  
生豈得無凋弊與君交好二年來天轟地裂奔風  
雷相逢一度一鼓掌笑殺時無英傑才坐使神州  
淪劫灰念之不覺心魂哀守持廉節止自了天生  
我輩何爲哉寧爲夷吾小器匡天下莫作西山高  
蹈終蒿萊

送朱子蓉歸嘉興兼柬其兄子葆

七年之間三別子兩在山中一城市休論心跡未  
能并可惜頭顱只如此風塵拓落何所爲東溪片  
月當茅茨老兄能歌弟能和松花酒熟清堪攜北  
方苦旱南征伐無事區區一吳越高天且隕不自  
憂杞國狂夫空白髮

贈蕭壯行

朝來白髮梳千下一卷道書眠亦把誰是人間無  
累人君乃閒中最閒者芒鞋短袷坐新秋不冠不  
襪輕王侯城中館舍非不美歸心思濯淩溪流淩  
溪流水清如酒子善爲箕孫酌斗門前一步是風  
波身後千秋我何有

登大士巖紀事 小序

己未孟冬二十有八日己未賽神於大士巖有五色鳥數雙止于林端鳴聲清好此鳥唯羅浮有之志稱異人至山則五色鳥翔集記予辛丑歲同梁器圃麥叔夏入羅浮浹旬三見之正此月也去今十九年器圃已爲古人茲余復與叔夏同見靈物遠來豈有意耶漫作長句紀之是日同登者何中木姪天閣二子贛勵凡六人

寒來未試登山脚積雨初消好行樂大士巖前一

揖餘四望風光殊不惡川原百里辨纖毫渚稻皆

收野岸高人家小梅日皦皦疎林赤葉風颼颼龍

江水繞山根出諸峰秀美真無匹土懸峭壁下嵌

巖森若文人多氣骨何來五色羅浮禽飛鳴下上

好其音洞天福地不棲息得無有意來相尋朱明

洞口華臺寺十九年前山裏事出山如送入山迎

三人見者今餘二豈有他奇副昔聞巔毛種種日

爭新臨高且共命尊酒不使仙禽笑妄人

朱廉齋以張穆之畫冊索題爲作磨癢馬歌

贈其象郡之行

鐵橋老筆多生趣畫馬解作癢磨樹三足作力一  
足拳短鬣蕭蕭首回顧蘭筋不動尾絲垂竹耳雙  
高目光怒吁嗟神物宜千里散放平皋獨何故戰  
士場中不一嘶瑤池可到誰爲御雖辭銜勒得天  
真未免蹉跎損高步古今萬物一馬也朱公索我  
爲長句頓覺風生尺幅間疎林葉脫天霜露海頭  
一州大如斗駿足驂驪豈堪駐何不負圖自出聖  
人前何不籛雲直上高天路世間豈無伯樂與王  
良爲君歌此畫馬章

集長壽禪林咏西番蓮花歌

西方佛有青蓮眼西番花有青蓮產朱絲作蔓碧  
玉英繚繞疎籬意何限世間只尚紫與黃此花無  
色能久長百花香者爭高價此花不售自開謝唯  
有幽人最愜懷竟日盤桓倚僧舍

送胡韶先歸南昌

惆悵爲此別寸心安可言如何相見來落落三十  
年長爲貧賤不足恨乾坤黯淡多烽烟君生十七  
去鄉井楚粵東西共萍梗闕下上書恒報罷軍中  
借箸無爲省碧血空傳先世名熱腸已化寒灰冷  
英雄失路欲誰投不妨胡越亦同舟世人安識徐

元直指心不爲曹公謀獨將至性交良友間復沉  
酣托杯酒因事長流濟物恩活人每試回天手嶺  
南嶺北千里中人人皆道胡長公貧賤之交常滿  
座揮金如土囊時空浮生百年一倏忽快意當前  
便須歇丈夫非愛七尺軀無人肯買千金骨草堂  
新構西山西東風三月花盈溪秫田得歲酒方熟  
童孫壯子行相攜天倫況復美羣從舊德日覺生  
光輝忠臣之後世必大浮雲於我何爲哉薜蘿帶  
芰荷衣淚滴先公墳下土三十三年游子歸

三月晦日同張默菴梁無悶藍公漪過賀秋

卿於西竺禪房卽事

飛花欲盡羊城南乍晴乍雨天青藍青春尚餘此  
一日炎風忽暑殊難堪偶同故人步郊郭有客客  
寓城西菴門前對立木棉樹誰家繫馬驕驂驪高  
槐近窓窓紙綠殿角風鈴細相觸枝間小鳥時一  
鳴對此翻疑在空谷問君何來來揚州輕帆破浪  
長江秋長星在天影落水芒寒氣黑魚龍憂北風  
其涼日苦短歇棹珠江應訓嬾圖書彝鼎共一牀  
促膝論交客常滿從來神駿不受羈去就之間何  
侃侃蓮花幕府謝珠盤落葉僧房對茶椀與君未

識相知名及乎一見心膽傾中懷萬種安可盡揮  
杯笑視雙青萍君思買山時未可我既無山仍輒  
軻短歌長嘯各未終欲去不去風雷過翻盆之雨  
何其大君不見來時鞞履去乘輿丈夫未得長高  
臥

以端溪水巖小硯寄戴觀察怡濤系之以長

歌

昔人只重端溪紫今之水巖勝于始始猶所採皮  
肉間山骨琢盡茲其髓一陽生後天益寒牂牁江  
落風林乾崖枯峽淺洞門出中有積水蛟龍蟠良

工斤斧重泉下石室無光朝亦夜千枝列炬照人  
行萬指懸壺向江瀉金錢之費日不訾冬春之際  
能幾時瑕瑜況復不相掩非具大力安能爲崇禎  
之中熊開府邇者名藩亦時取後先疏鑿分東西  
文采精華並千古往時蕉白稱極佳今人指點尋  
青花以茲相石亦未盡必有生氣如雲霞拊不留  
手柔無骨墨質愈堅磨愈發宋坑宣德雖尚存粗  
則傷毫細則滑伯樂一顧異馬空世間所患無追  
風寄公一片雖小品由來亦自蛟龍宮菲齋久伴  
書生窮咿唔吟嘯不可終去茲卑陋依尊崇使君

聲韻如鐘鏞。揮毫落紙生蜺虹。況今持憲出乘驄。  
秋霜春露一言中。非汝孰與成厥功。嗚呼挽回造化良。不易補天亦屬人。能事五色之石將無是。

積雨柬何玉其

積雨村邊路溪潮長石痕螭房環結屋龍目細垂  
園舊友仍羈寓新秋好晤言樓高雖可望各自閉

柴門

題繡佛齋詩

馮司寇再來祖母旌表陳太夫人所著

遭逢雖不造文采獨堪誇姑婦成雙節詩篇屬大  
家苦心追正始真調脫鉛華世業聞孫在芳蘭不

妄芽

玉潔因成色金堅遂有聲古人言不朽皆自性情  
生寡雀夜中唳哀猿申旦鳴何須立文字聞者盡  
沾纓

送梁言公之惠州

豐湖清絕地亂後幾人行秋水明諸壑官橋帶兩  
城少年初旅食多藝盛時名佐幕前賢事良才斲  
始成

園居雜詩

有月鳴鶯早無風乳燕高倚檐花刺帽循竹露沾

袍散謔從吾得驅馳與世勞  
曉涼開卷罷  
畊鑿語  
兒曹

野色浮千樹池光鑑一峰  
高標人外秀  
新綠雨邊  
濃此地頗安堵  
他鄉時舉烽  
樓頭數杯酒  
佇立到  
昏鐘

乾鵲來何處  
高巢占一椹  
可能知喜氣  
空自戀貧  
家就食雛爭母  
教飛翼礙花  
老夫圖穩臥  
未許報  
牕紗

獄中雜紀

鈴柝鳴終夜  
星河耿暮秋  
但令圭未玷  
休問杼曾

投東海仍秦帝  
南冠號楚囚  
此身翔不下  
何處學  
輕鷗

土室分東半  
疎籬別作房  
竈烟凝几研  
牕雨滴帷  
牀書鼠游無  
憚宵蟲網不  
妨故人知更  
甚消息隔  
重牆

把釣時臨水  
爲園少近郊  
本非羊慕蟻  
真有鹿懸  
庖多病尋方  
藥無才愧易  
爻古今同一  
夢玄白不  
須嘲

園扉今半月  
佳節報重陽  
粵俗人登墓  
秋風稼在  
場天遙唯見  
鴈地苦已飛  
霜書札詢兒  
輩溪花幾



處黃

今年月食旣疊向夏秋看晦魄冥無色虛輪側未  
安陰消如有象候滿欲何端三復修刑戒能無儆  
有官

南生期免戮葛相戒求聞一自違丹闕唯知戀白  
雲蟬無遮噪葉豹有害身文將老嬰縲綫深慙父  
母墳

柳底看棋出籬門步月開偶因閒得樂旋似寂生  
哀世豈祥凶物人應棄死灰如何文字債猶到獄  
中來

古塲標虞苑高城號尉佗青蠅猶宿昔黃屋久消  
磨午夢書能送秋吟酒易多死生聞有命緘口欲  
如何

已是傷心客那堪太息聲隔牆來斷續入耳怨分  
明世俗趨傾險神州尚甲兵何時瞻化日青草獄  
門生

栩栩夢中蝶飛飛霜後螢半牀書共寢永夜月同  
醒覓紙題新句籠燈課舊經已忘身是繫只作戶  
長扃

初度尋常度今茲倍愴神傷哉居穢地不敢禮先

人亂日生何樂餘年死與鄰只愁來世事難定報  
恩身

一旬雙諱日近接我生初淚滴重泉下身從九死  
餘爲禽填苦海作蠹飽塵書已比先人老千秋愧  
不如

九月寒如此今年閏較催蕭條天外雨飛灑粵王  
臺風定聞新鴈人來說早梅江山寥落處登望幾  
時開

往哲居憂患皆爲進德門鄙人無意志一卷自朝  
昏渴得楮梨快寒加襪被溫近鄰賢首領間日送

清尊

烽火兼舟楫艱危四十餘幾爲弓外鵠一葬海中  
魚債豈他生償名應獄吏書閒來尋舊將追問亂  
離初

一夜江城雨蕭蕭長鬢華入心鳴萬點爲潤想千  
家倍助天昏黑如兼客歎嗟鄉園歸未得催盡小  
梅花

三旬行萬里奏使舊能任驛路無淹騎秋風有報  
音遲畱關厄數速免或他侵死地寰中滿爲憂豈  
獨今

神籤曾信手消息一陽初始日深愁遠而今慮且  
虛灰寒終應管雲暗可勞書天地心誰見乾坤莽  
自如

多慮憑天遣深寒到酒消掩書吟竟夜辭客臥終  
朝霜角思江檻風鈴隔麗譙向來臨眺地紅樹一  
蕭蕭

舉世悲先烈虛名萃眇身局天非一日畫地又何  
人不獻鄒陽作終知石父伸從來黃與綺秦漢未  
稱臣

身世猶如昨風威祇覺寒數爲百日滿序是一年  
殘北使歸何緩南音操已闌敝衣行卒歲省事且  
爲安

春前殤兩樨灾禍不云孤豈謂妻孥淚居然泣老  
夫往來詢動履肥瘦寄衣襦會有生還日張儀舌  
在無

一歲聿云暮萬方勞未還濟師江上戍轉粟雪中  
山身等齊民列名蠲力役班合將經月繫消折半  
生閒

昨日報春初今朝是小除舊枯泉脉潤新脫柳芽  
舒生態看星鬢憂端卜曆書家家勤祀竈兒女望

何如  
已歇霏霏雨初迴習習風日車朝漸北斗柄夜方  
東大夢過前事長愁到老翁羈棲頻度歲只欠獄  
門中  
歲旦明朝是天書昨夜歸豈應違咫尺無處問恩  
威且學餽糟醉從噉食覈肥入春開笑口不復有  
危機

賀何不偕新翁

與君皆老矣繼美在弓裘卽此天桃賦無非式穀  
謀百年寧復事五岳續爲游頗憶曹丕語成翁未

白頭

走筆送袁士旦歸江南兼懷魏凝叔和公楊  
長蒼

積雨日未已客中懷可知如何相見地卽咏送行  
詩半月趙佗國三秋文獻祠好游年少事搔首鬢  
如絲

一見卽投分相知寧在多吾尤推意氣人共誦詩  
歌卞璞終應剖南圭近已磨誰能記微賤爲報幸

無他  
送羅仲牧移家車陂

陂上家家好清溪帶綠筠近聞詩社裏添汝白頭  
人門向何峰住樽堪席地陳太平遺曲在為我拂  
龍唇

別後寄方蒙章陶苦子兼柬何不偕梁藥亭  
吳山帶黃葵村定郵詩之約

別時蟾兔缺不覺漸成圓旅夢猶高館生涯在釣  
船風輕中酒後夜永一陽前為有郵詩約寒燈頗  
廢眠

曲江千載下作者未全湮筆墨無生氣光芒愧昔  
人誰能師日月可以喻清新大海波瀾在驪珠自  
不貧

楊敏叔六十

白雪鬚眉在青山日月深貧能持定力老不負初  
心清磬夜當夢梅花寒出林一陽來復後甲子又  
從今

郊行

春郊一尊酒且以樂朝昏遠水澄珠寺遙峰閉石  
門鼓鼙鶯語地烽火杏紅邨短鬢絲將徧能銷幾  
處魂

閨中秋夜阻雨不得赴方蒙章之約枉詩見

聞貽賦此答之

人間無好月天上又中秋  
雨點微霑瓦簫聲漸閉  
樓遂違杯酒約空枉夜珠  
投旅宿兼葭外伊人不  
易酬

後一夕同龐祖如方止止陶苦子龐毅子亮  
子羅顥甫頤甫宿亦菴

尚滿中秋月微開昨夜雲  
古牆杉影落淨地佛燈  
分坐久鬚眉見天空語笑  
聞幾時還聞八重得對  
諸君

過弼唐感舊贈龐祖如

策杖秋方晚村橋日欲斜  
樹風喧萬葉山影靜千  
家瘠土安淳俗澄溪漾  
細沙擬尋龐氏隱還種邵  
侯瓜

他日誰青史當年易姓名  
門人思李固孤子寄程  
嬰我愧前賢事君猶古道  
行白頭懷宿昔竟夕自  
霑纓

初月

銀河誰下釣天道自張弓  
色借桑榆日涼生玉笛  
風山光開半面人影在牆  
東不俟居弦望清輝萬  
國同

送屈本菴入都

白首皇都客茲遊亦壯哉  
夏雲凝岱岳秋色在金  
臺萬里何窮路三閭未易才  
嶺頭無可戀應爲荔  
枝回

壽何克諫

洞口桃花落雨餘清溪流  
出引樵漁姓名不愧何  
徵士甲子終虛宋永初七  
字題詩傳白社千峰採  
藥散比閭知君妙得還童  
訣玄鬢朝來漸滿梳

歲暮送區魚山歸香山

長將筆舌代耕芸海島焉  
能絕世塵百里暫歸貧  
有母一年將盡老催人潮  
光似火船頭曉梅子如  
珠屋角春亂日相期無可  
祝早占熊夢慰慈親

壽雷峰天然禪師

孤高如月萬方看至道無  
言仰頌難垂老尚聞勤  
梵行太平先已薄儒官身  
爲碩果時方剝書滿名  
山墨未乾曾住朱明洞天  
上仙人不敢愛還丹

雨後馮再來中丞招同王  
長文姜坤侯何漣  
若陳繼袁諸子泛舟謁南  
海神祠登浴日  
亭望海是日晴霽詰朝復  
雨卽事賦謝

南人誰不頌芄苗百里行  
春路未遙鴈翅城開雲

尚漬虎頭山出雨初消元戎小隊移輕舸大海微  
風入短簫天爲吾曹晴一日江花林月好相招  
千秋吏部文章在三月中丞節鉞來廟壓平潮諸  
島沒天橫峰影海門開布衣未敢辭高宴赤烏無  
嫌踏野苔南國禹功元不到安流須仗濟川才

獄中柬黃畏齋楊巍材陳是菴

埋名不免墮園扉枉作山中老布衣尚有高人能  
命駕豈應吾道遂全非夏侯未死猶傳業叔夜如  
生亦采薇歲盡鄉園歸得否紫梅花落釣魚磯

邑中同人招飲西山草堂卽事

名園重得聚英豪暑月杯盤敢告勞匝水松陰鋪  
地濶出牆山色帶城高時光老去深知惜筆硯愁  
來漸懶操同是少年吟嘯地新霜看上鬢邊毛

過六貞女墓 小序

順德龍津李氏處女也丙辰春粵東大亂  
有強暴謀脅致之六女懼不免夜以酒相  
酌一夕同赴水死比曉出之明妝儼然臂

約紅羅兩兩相結其家合而葬之龜山之

陰當事者立石表之曰六貞女墓

崑岡生玉總無瑕列女貞魂是一家一夕便成千



古事孤墳空與後人嗟。乘鸞合上三珠樹。化雪應  
爲六出花。處子立名青史少。曹娥江水在天涯。

李蒼水司訓長樂以羅浮蝶繭數雙及繭布  
見寄云布卽蝶繭所成翼日蝶出繭中五  
色紛破翫對之間因成一律寄謝其意

仙遺衣化羅浮蝶。蝶化山蠶復作衣。栩栩未離莊  
叟夢。絲絲還上玉人機。質無綺麗宜於隱。生有文  
章不愧飛。多謝良朋遠相寄。東方蟬蛻亦依稀。

夏至夜卽事

初晴天氣便炎蒸。小閣風多最上層。臘酒舊藏椎  
髻婦。春茶新惠住山僧。頻探落月移湘簟。自惜流  
螢掩夜燈。一歲算來今夕短。老夫猶爲幾回興。

仲冬十三日贛兒受室率成一律示之

燈紅月皎兩相宜。且放中懷入酒卮。萬種未完爲  
子事。百年過半作翁時。山寒漸入青春色。梅老偏  
高白雪枝。莫道傳家無素業。先公猶有一經遺。

贛兒受室承諸公贈詩賦答

千秋名立一家捐。心死灰寒四十年。直爲詩書存  
此脉。重勞塵土作諸緣。義爰始叶包蒙古。韓奕多  
承纘。祖篇若使析薪譏。可免釣竿吾在五湖船。

送孔樵嵐宰樂昌

復掛征帆去此都勞勞終日在馳驅十旬三上二  
禹峽百里連分五嶺符南楚烽烟嗟往昔東風民  
物望來蘇關門鎖鑰須公等骨氣昂藏一丈夫

送何不偕

少年無遠不同遊比者輸君已數籌酒後獨尋燕  
市筑雪中曾買建陵舟九州未必容閒客五岳何  
常笑白頭我亦從茲理帆席大江明月記清秋

行路難

君不見天上之星墜爲石又不聞地中有雷生霹

靄星有光芒猶可避雷無定所誰能測殺人豈必  
干與戈尺地寸天皆局踏重城高寢自謂安中夜  
思之眠豈得何能變化爲螭螟飛入睫中人不識  
又

翩翩之鴈來天隅中有一者飛而孤自喪其雄不  
並宿江中警夜甘爲奴江濱之人少慈惠一網高  
張百禽殪不虞永斷匹偶恩食肉賣毛爲得計

又

君不聞蜀山多陰稀見日羣犬吠之盈萬室又不  
聞野人有婦一目偏出見舉世皆不妍是非好惡

何有定。昨者高岸今爲淵。勸君且自酣盃酒。勸君不用狂開口。正言自古有戈矛。上士聞之皆卻走。

又

君不見五陵年少插兩弓。左射右射皆能工。金丸如星羽如月。驕馬蹴踏鳴秋風。林中走獸獵已盡。仰面四顧蒼天空。千年老鶴青田產。昨日瑤池銜玉簡。未迴勁翮排天門。莫使霜毛刺人眼。

又

卞和入山得璞玉。獻之未售先刖足。秦王易以十五城。趙國不與終受兵。從來至寶物所忌。錐刀之

末。今人爭小民。止可求粗足。朝飯糟糠暮飢粥。輕裘肥馬不易誇。有司視爾如仇家。

又

隰有桑阪有漆。朝朝斤斧無虛日。社西老樹且千年。於人無益已則全美材。豈合終棄置。用之貴得逢英賢。昨者公家求大木。匠石顧之蒙見錄。已辭根柢落高雲。却伴沙泥委空谷。

又

葡萄酒黃金卮。玉簫瑤瑟聲參差。佳人長袖爲君舞。今時不飲將何須。是與非得與失百年都是攢。

看日劉伶一醉死便埋嗣宗多事猶詠懷畏首畏尾身餘幾智士畏名如畏鬼君不聞隋家白鶴自拔毛周廟犧雞啄其尾

又高雲賦半心賦交空谷  
孔雀之血能殺人翠鈿金尾光徹身古來賢聖不外飾蛙聲紫色能亂真一人獨坐深宮裏拜跪滿前皆有以誰懸明鏡照中心爲佞爲忠總相似仲尼一語君勿諉先觀其行後其言君子溫溫如白玉利口便便中有毒其毒愈甚文愈高請君記取孔雀毛

又

落花一別樹安擇清波與污泥自古皆有歿刀兵牀第無高低夢中得食醒難飽夷齊身餓名不朽流芳一日不易爲遺臭萬年安足道

獻大司馬制府吳公一百韻

北極軒長策南天眷重臣節移閩海近恩及嶺頭新睇望雲霓久霑濡雨露勻旌旂皆改色閭井自生春地潤衡廬接星分斗廟鄰滇流東注海橫浦北封秦舊俗民猺雜遺風鄒魯醇威行千里肅綱舉百城振文武趨蓮府溪山望畫輪詩須傳樂部

德侯紀貞珉往日絃歌暇清篇字句真飛騰珠不  
脛磊落筆如神世誦吟燈作官聞酌水貧孤標誠  
絕俗高義久驚人法重催科考時兼薦饒臻後先  
羈舊尹三五及迷津相戒車前轍誰從井有仁賴  
公垂惻隱遂得免顰呻數萬金錢負多年簿責頻  
下車皆遣去重任畀於身湯網開窮鳥莊波借涸  
鱗卽云於物利未或以財徇俠氣過朱郭名流仰  
樂歎各期空冀野爭得望車輪銀燭連開宴瑤階  
九列儋攀畱常累月酬唱動兼旬陽羨多栽茗江  
東自足蓴四鰓魚入饌千日酒沾唇白雪操常凜

芳蘭佩自紉驥才終必展龍屈理須信令譽通黃  
叟能聲徹紫宸九重恩破格萬里檄征閩爰自神  
明宰高超岳牧倫六條持法慎九伐紀功純埃火  
飛猿峻妖氛紫帽屯逆萌生帶礪緩死翼宵晨徵  
士時緘劍搜財或算緡莫爲分玉石終見共胥淪  
不枉聞清論如絲拜御綸繡衣明獬豸高印躍麒麟  
麟受節初開府兼官屬代巡澄清徐攬轡光霽儼  
垂紳一鼓更絃瑟先移曲突薪萬民歌樂只多士  
荷陶甄桃李三山徧韜鈴列校俊島人宵自遁荒  
土日加昫邊計奇難測雄功立不泯撫謙師大樹

克讓協同寅憶昨杉關出將過粵海漭香花連水  
驛涕泣灑山榛父老追邪谷輿歌繼洧溱尚思崇  
俎豆豈憚走嶙峋嶺嶠人何幸皇天若汝親矧當  
凋瘵後初過亂離辰鄉落朝無火郊原夜有燐三  
毛名飯毳百結號衣鶉元氣公能補民心願莫因  
經時虛遠想一旦下高旻疾痛難更僕吁嗟自鬱  
氤頃從藩鎮始遂使利源湮凌雜供求取纖毫見  
怒嗔生民如草芥王度漸緇磷叢借還無日狐威  
假不馴驕矜行自絕骨肉且相信竟啓東南釁同  
歸樸滅均餘波仍汙染囹圄日囂斷孰市田文義

誰從鄭俠陳脂膏原粵物鞭樸亦吾民世幸銷兵  
革恩宜用撫循輸將前不易賜潦近加辛卽盡敲  
民髓何裨秉國鈞富強須有術山海况多珍夷舶  
原交市遐方舊貢蠙有無通物產聲教暨絃夤鹽  
鐵書何密耕屯計可掄兵民如復合風俗庶能淳  
夫子今豪傑文章古孟荀學能全體用巧不事組  
紉詩禮趨庭得風規昔馴遵先公開棨戟大節挺  
松筠善述真無忝仁聲美有洵會吹寒谷律終解  
捧心輦賤子何爲者其生亦已述在金慚躍冶於  
木更輪囷好著登山屐常冠折角巾行藏依草野

出入遠城闈欵案看書臥顏顏攬鏡皴何知年冉  
冉祇愛石粼粼東漸曾過浙西行未到岷遙登太  
行上亦泛五湖濱處處聞風烈超超遠世塵溯洄  
心未已嚮往足猶踐行部干旌出防邊介士蹲飛  
揚明鐵鎧鏗鎔響金錚並集三江鷁初停六轡駟  
霜應生白簡風欲起青蘋北斗瞻今近南溟氣自  
申扶攜觀教化洗滌待咨詢幕府多英俊賢君愛  
笑嘖肯容狂狷士長揖列嘉賓

走筆送家紫馭孝廉

薄暮山歸力殊憊小童報子將于邁披衣急欲走

送君東西城隔愁無奈君來幾日秋已窮黃花開  
殘多朔風摩天黃鵠卻垂翅鷹隼橫厲盤高空我  
聞志士有如弓在挽其屈愈深發彌遠看君才氣  
固落落世上何人在心眼明朝聞道理帆檣短歌  
相送不成章飛揚之望屬吾子僕不如人今老矣  
客有自粵西來者以石遺吾家宗虞曰此某  
將軍所寶爲王祥臥冰石也同人多爲詩  
予歌以和之

吾家介弟饒花石有石陂陁不盈尺白章黃質理  
燦然彷彿中間有人跡身如轉側面右向左袂蒙

茸覆衣上四周環匝白皚皚云是王祥臥冰狀冰  
間有物不可名是魚非魚如有情石於天地最頑  
鈍豈亦慕義師高行扁舟載石來千里人孰無親  
親有子感茲雪裏得嘉鱗各向高堂備甘旨愛君  
能養贈君家一時鄉曲爭相誇言似不似者各半  
將無畫足添於虵吾聞李廣善射虎草間有石射  
飲羽至誠所感金石開是虎非虎君試猜

贈別王礎塵

昔年與子珠江別太白有芒宵八月今來送子五  
羊城土木雙星守不行徘徊往復似有戀母乃類  
我故人情昔年見子鬚如漆今來白髮參差出死  
生萬變十年中唯有兩心尚如一不肯低頭就一  
時不會失足受磷緇只將熱酒澆懷抱下士聞而  
大笑之君不見天上之星密如雨亮天之工纔有  
五世間豪傑豈能多碌碌因人自終古

端州七星巖題名歌

媧皇未補星辰漏神人驅石爲雲走赭鞭鞭斷雲  
不前天風吹落西江口西江波濤千里來雷霆霹  
靂蛟龍吼洞府沉深絕照臨奇象恠形多所有少  
陽數七老陽九艮止爲山折如斗一開一闔相蔽



虧天樞天軸通關紐質如白玉貞且堅雨積蒼皮  
光不垢絕無寸土可栽培况有靈根作林數中虛  
或類輦鼓鳴下垂乃可金鐘扣磴道遙盤霄漢開  
陰崖忽出他山後扶嘯臺東千尺峽下視諸峰若  
培塿過鴈聲高每倒聞行人路窄難迴肘百曲湖  
光繞寺門一片山城掛牕牖尚憶曾游少壯時今  
來不覺成衰醜吳山越水多俊人天涯此會誠非  
偶爲君小試燕然手與酣落筆無蝌蚪八分瘦硬  
高崖陡奮臂大書人某某石老天荒同不朽

甲子重陽後四日蔣莘田大叅招同潘亞日

屈翁山登城北諸峰望全粵形勝還飲酒  
粵王臺上時有建復鎮海樓之議卽事賦

呈

衡岳東走千萬峰南支五嶺爲其宗龍川瀆水在  
左右中有都會爲番禺海天清迥見萬里曠望可  
以開心胷重九已過秋爽至大夫車騎來雍容高  
峰表裏臨城北下視朝臺猶咫尺霸業升沉已幾  
迴文風極盛餘三百將軍猶紀廖與朱當日何公  
獻版圖樓名鎮海故有以五層特立當城隅自從  
樓廢烽烟逼人事蕭條多瓦礫整頓欣逢子大夫

九衢三陌生顏色卽今海宇無纖埃乾坤元氣須  
人培杖藜父老各翹首何時重見高崔嵬且當釃  
酒臨高臺松風謾謾帟幕開甘棠勿翦桃李栽先  
公作宰趨庭地白首乘驄使節來人生所貴有稱  
述羊公峴首今蒿萊令名直與天壤偕餘子碌碌  
安在哉後來不朽應吾儕爲君滿引手中杯

扶胥歌送王阮亭宮詹祭告南海事竣還都

兼柬徐健菴彭羨門王黃潛朱竹垞諸公  
扶胥之口水所歸青山浮出如無依長波際天不  
可極白日夜半揚其暉東風吹上木棉樹片片盡

作紅霞飛南海之神絃冕古瓊樓玉殿開朱扉前  
駕赤虬後文螭左驅天吳右馮夷虹蜺架道雨師  
灑蛟龍夾轂瞻旌麾九重秩禮來南紀誰持玉節  
漁洋子天上連宵動使星世間久矣傳詩史歸舟  
暫泊珠江南問奇訪古多所探都將十載相思夢  
并作江城半月談唐詩三變猶堪把明詩三變風  
斯下落落乾坤得數公盡掃榛蕪歸大雅羨門子  
竹垞生與君意氣遙相傾徐公淵博能下士黃潛  
慷慨多秦聲我抱區區君所察來時更枉羣公札  
山陽叔夜懶何堪吳下阿蒙目猶刮送君有作兼

羣公鳳凰今已飛梧桐和鳴律呂賴公等且放野  
鶴閒雲中

何克諫八十

青蘿山中有茅屋土墻蠓徑幽人築春來屋內屋  
外花客坐前山後山竹盞頭良醞開數升架上素  
書閒一束落落乾坤覺汝賢籜冠蘿服望如仙正  
逢涓叟投竿日應見希夷大笑年

壽王大將軍孝揚

漢代諸侯誰第一仲華年少封高密晉家武庫杜  
當陽臨邊著述何洋洋將軍獨立千載下頡頏二

子兼其長兩河作鎮始弱冠大江節鉞臨荆揚楚  
波西來不敢狂吳人高枕憂可忘清歌徹夜調笙  
簧雄風披拂臺嶺傍島夷跪拜獻明璫旅葵馴象  
來梯航翠禽白雉籠千雙將軍所寶唯文章清齋  
萬軸函縹緗軍中多暇加丹黃時揮翰墨祖二王  
虎龍戲躍劍弩張階前爪士森兩行竦立汗下歎  
莫當一畫力敵千鈞強去年憶在三江口司馬舟  
中聯句久中央置研傍大斗一人賦詩二飲酒飛  
觴授簡迭奇偶秋菊新花映牕牖夜闌刻燭復數  
首清風白雪傳林藪如此驚才古希有况兼制行

一無苟高堂色養有壽母雞鳴問寢垂紫綬鴈羽  
參差列前後甘棠樹老蘭英秀公家世德天所厚  
立功立言同不朽以茲三爵爲公壽

寄贈卓火傳傳經堂歌

卓侯寄我一尺書細行小字千言餘開緘意氣溢  
毫楮烟雲繚繞生吾廬鳥翼欲搏南溟浪劍鋒直  
射牛斗墟不平之鳴有若此何況龍光鳳彩揚天  
衢伊昔休明代朝野交驩虞公卿折節下韋布草  
野高談皆廟謨天南地北未相見一字若得隨侯  
珠故家文獻今未墜君門累葉名通儒况聞忠烈

有令祖月黑歸家夜騎虎燕山潛邸龍未飛一流  
南移真逆覩終知神器固天授不惜糜軀共殉主  
文皇兒戲視方黃獨謂先生言可取時殊世易三  
百年兒孫尚守高曾矩堂開吳越號傳經四方投  
贈詩盈庭吾聞六經之傳有明晦時晦則晦明而  
明壁於秦火出於漢蝌蚪盡作絲竹聲至今大義  
如日星善傳善述必有以請君爲我側耳聽請君  
爲我側耳聽

夜雨有懷東張桐君兼寄董无休

醉來不覺和衣臥小樓未滅看書火夢回四壁走

風濤空牀聽雨三更坐忽憶少時吟興狂君與董  
侯同過我席門蓬徑話終朝寶馬高車停道左董  
侯欲去君且畱予時更鼓瀟湘舵落落風塵老漸  
來蕭蕭白髮生無那君才自足奮桑榆致身不肯  
游青瑣屈伸潛躍各有時南北東西何不可董侯  
屢寄山陰書君來日剝離支果從前屈指幾烟雲  
吾輩幸存非坎坷君不見五羊城下陰雨中劉苑  
荒蕪趙臺墮

嘉魚

嘉魚潛石穴終歲氣常寒本欲承珠露寧知上玉

盤有無通雅咏咫尺隔風湍未必名爲累隆冬澤  
易乾

嘉魚吾舊識高價市人爭似鯽身微削如鱖鬣乍  
生細肪凝石乳兼味著霜橙未入宵來饌吟詩久  
不成

送王蒲衣采詩惠湖

樹樹熟離支殊非遠別時新蟬湘子廟初日海王  
祠路記雙江合文猶八代衰時無採風使草野亦

陳詩

送周德涵

便作天涯別重逢未可期快聞經世論兼讀過庭詩  
騏驥宜千里鷦鷯且一枝野人頭已白不復問

當時

贈別黃忍菴太史

百年無作者之子擅奇才豈謂黔中使翻從嶺上  
迴衡文時望重握手老懷開更喜居停近深宵亦  
往來

東郭淹游跡南園接古祠乘車為客日閉戶著書  
時怯醉開椰酒從酸剝荔支海隅多異物嵇陸未  
能詩

學到難窮地文能不愧名雖為今太史猶似老諸

生江海心常下山林跡未并一時稱盛事千里聚

同聲

時王阮亭宮詹高謨園廷評並以使事至

斲為鄉井別十日惜分攜觀化俄生柳

予時病瘡

看書

亦杖藜心知龍節返路出海雲西會買扁舟送漁

家水滿隄

病中承彭子安見過別後奉懷

度嶺年殊少軒車滿路光病中吾見汝秋後客何

鄉伏枕違清論開篇得妙方愈風文檄在繼述有

諸郎

時見惠尊人躬菴文集

送林敬臣

南鴈去不極北風聲正喧何堪衰草日還是送王  
孫再世依畊鑿空山矢寤言與誰登冠石放眼望  
中原

病足舟中卽事

與劇思憑覽人扶上小舸客囊攜蕙苴鄉酒寄松  
毛少食肌時減多眠骨屢高可憐中夜夢躍馬尚  
能豪

送溫茂長

三秋違侍養萬里赴京華江路聞霜葉天門照雪

花親存宜薄祿年少且辭家蕪絕金臺上看君步  
玉驂

送錢日天

度嶺三年客歸心四月天別離良未易鬚鬢况蒼  
然古筆追秦漢深杯得聖賢似君何不可高咏滿  
吳船

輓湯惕菴先生

大雅久云沒中原尚此人晨星方在望宿草已踰  
春便自成千載何絲贖百身唯餘名公樹蔽芾粵  
江濱

初春江行有感

人日吟詩坐客船  
白髭臨水一茫然  
西來山坂雲中峽  
北上江明雪後天  
幾處小帘春市酒  
誰家新月夜鳴絃  
郊原頗記從軍地  
草草東風又十年

過鍾莘野畱贈

萬峰東走峽門青  
巖石蒼蒼見列星  
遊子偶來停短棹  
故人高臥有閒亭  
花明欄檻朝長倚  
月滿溪橋夜不扃  
四十年前文酒會  
白頭相對記趨庭

寄周平山

介節清風最起予  
此心雖邇蹟常疎  
青春蓮府銜

杯罷明月茆齋入  
夢初七國奇才多在客  
六朝名士總能書  
何因報我瑤華句  
一紙寒山慰索居

寄葉許山

荔枝曾自小園分  
荔子紅時倍憶君  
短髮細梳涼夜月  
虛窓高掩後山雲  
狂書往事追狐史  
夢寄閒身到鶴羣  
十載別來今大耋  
鱷湖觴酌更須勤

寄葉猶龍

門功先世在安邊  
少執金吾漢帝前  
寶帶尚存天府賜  
篋書猶是異人傳  
閒中歲月耽山水  
亂後文章託管絃  
長記黃塘好風景  
近來添得幾湖船



梁顛若池中蓮開一花紅白各半索賦三首  
半紅半白兩相加開向城西處士家何處更尋連  
理樹一枝全勝並頭花朗如弦月猶銜魄清比江  
雲欲變霞知道先生真訣得石牀相伴養丹砂  
金行爲白火爲紅大冶元多鍛煉功朱粉並施鄰  
女美色香齊現法輪空高懷濯濯居人外巧笑盈  
盈立水中記得六朝王儉府一江南北互相雄  
豈曰卑棲意自殊亭亭泥滓不會污一莖擢出仙  
人掌二氣凝爲太極圖髮爲丹心常早白玉緣泣  
血半成朱雌雄好是芙蓉劍南斗光芒近有無

宋嶠菴招飲南園卽事賦別

客裏深勞命酒杯南園臘月正梅開城根倒影夕  
陽落橋下寒聲潮水來千里賓朋萍跡合百年懷  
抱鬢毛催滄江白社吟詩地送爾風流宋玉才

答張桐君

數月逡巡未報詩十年離索更何爲雄心老去成  
灰燼白雪吟多上鬢絲虞苑青蠅嗟往事陸生車  
馬記前時只應共擷東籬菊買醉南園濁酒卮

至日同溫茂長姪汝侯雨中入高峽  
寒雨從朝歇也無酒杯相命且狂呼長風直破西

江浪短日多行百里途峽勢益奇霜既落山容如  
赭草全枯年年此地猶為客愧見峰頭石望夫

祝張二尹文宿

郭邊潮水日潺潺官舍無如少尹閒一卷新詩是

公事夕陽支枕對西山

又

昌黎曾為記藍田君較藍田一倍賢鉅竹老槐俱  
不有憲間松樹已十年

送周維念

西江秋水正湯湯暑氣初銷小閣涼歸客過逢初

泊舫病身相送不離牀關山別路無杯酒書札京

華少報章臥寫新詩不成字故人休訝懶嵇康

病不能報吳青壇  
朱竹垞諸公書

送葉淵發

家門七葉金貂盛之子由來是冷人一偈安心居  
士法半年餐荔嶺南身秋江有酒鱸魚美碧落無  
雲鴈路新不向津頭望歸棹病來哀樂總傷神

贈別劉肩菴

相逢未得數追倍見說曾從絕國來鳳詔到時蠻  
女拜龍神祭日海雲開班生自有飛揚志漢武唯

求跣地才斯世昇平須俊傑看君非久滯蒿萊

獻祝大司馬制府吳公

清風此日滿南隅文武兼權是丈夫百粵諸侯趨  
使節八蠻君長拜兵符腰橫牛斗星邊氣句得驪  
龍領下珠浙水自來多俊傑幾回封爵屬通儒  
海門會報射長鯨身作東南萬里城彩筆不妨裁  
露布素絲隨處建干旌令如山岳軍皆肅心在水  
壺政自清幸托樂郊何以賦家家絃誦答昇平  
水清沙碧石粼粼千里舟車赴令晨檠戟蔥籠高  
峽曙梅花消息定山春一陽復後天開子維岳生

初歲在申會見作霖蘇九有先爲膏雨慰南人

送高謏園廷評

桂江猶帶劫餘灰主試深煩作賦才麋鹿竹邊騎  
馬過鷓鴣聲裏放船迴逢人便問端溪石作客徒  
登趙尉臺不得留君到初夏枝頭紅荔正花開

送楊荆湖觀察內擢京卿

夾道笙歌萬姓喧俱來江上送高軒三年預試調  
羹手兩粵兼承化雨恩內詔卽今趨鳳闕名流何  
處望龍門桃花院宇論文地峴首山前片石存  
荆楊相接氣原通南北新花次第紅粵嶠尚懸卿

士月楚帆先滿大王風濟時妙畧憂能遠傳世清  
篇老愈工此去明良慶相得賡歌遙在九天中

莫干伏日同王礎塵張桐君朱子成周文康梁藥  
夾巖坐亭林叔吾董克灌王紫巘集潘亞日視蒼

樓分賦因寄董无休

池連溪樹暑皆消酒得良朋興更遙片席領風來

極浦斷虹將雨下青霄樓名趙尉高相望山有安

期坐可招三十年前同賦客白頭書札到今朝時克

灌奉其尊人  
无休書至

